



Na osnovu člana 16. Zakona o Vladi Unsko-sanskog kantona („Službeni glasnik Unsko-sanskog kantona“ broj: 5/08) a u vezi sa članom 27. stav 1. tačka 6. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije Bosne i Hercegovine“ broj. 39/03, 22/06, 43/10) Vlada Unsko-sanskog kantona na sjednici održanoj dana 17.12.2019. godine, donosi;

## UREDBU O KANTONALNOM ŠTABU CIVILNE ZAŠTITE

### DIO PRVI

#### OSNOVNE ODREDBE

#### Član 1.

##### (Predmet Uredbe)

Uredbom o Kantonalnom štabu civilne zaštite (u daljem tekstu: Uredba) osniva se Kantonalni štab civilne zaštite (u daljem tekstu: Kantonalni Štab) kao stručno-operativni organ Unsko-sanskog kantona (u daljem tekstu: Kanton) za zaštitu i spašavanje ljudi i materijalnih dobara od prirodnih i drugih nesreća, uređuje njegov djelokrug, sastav, materijalna formacija, popuna, opremanje, finansiranje i druga pitanja od značaja za organizaciju i rad štaba.

### DIO DRUGI

#### NADLEŽNOSTI KANTONALNOG ŠTABA I NAČIN OSTVARIVANJA FUNKCIJE

#### Član 2.

##### (Nadležnosti Kantonalnog Štaba)

- (1) Kantonalni Štab je stručno-operativni organ nadležan za vršenje poslova koji su mu Zakonom o zaštiti i spašavanju ljudi i materijalnih dobara od prirodnih i drugih nesreća ( u daljem tekstu: Zakon o zaštiti i spašavanju) stavljeni u nadležnost
- (2) U vršenju poslova iz svoje nadležnosti Kantonalni Štab u miru funkcioniše po potrebi:
  - a) kada zaprijeti neposredna opasnost za nastanak određene prirodne ili druge nesreće koja može ugroziti život i zdravlje ljudi i materijalna dobra na određenom području u cilju preduzimanja preventivnih mjera na sprečavanju ili ublažavanju posljedica te opasnosti ili nesreće,
  - b) kada Vlada Unsko-sanskog kantona (u daljem tekstu: Vlada Kantona) proglasi stanje prirodne i druge nesreće na području Kantona,
  - c) kad razmatra stanje priprema, organizovanost, osposobljenost i opremljenost za zaštitu i spašavanje svih nosilaca zaštite i spašavanja na području Kantona i predlaže mjere za dogradnju sistema zaštite ispašavanja,
  - d) za vrijeme vježbi civilne zaštite.
- (3) Kantonalni Štab u ratu funkcioniše stalno odnosno dok nadležni organ ne donese odluku o ukidanju ratnog stanja.

(4) U uslovima iz stava (2) tačka (a) i (b) ovog člana Kantonalni Štab civilne zaštite ovlašten je da naređuje upotrebu snaga i sredstava zaštite i spašavanja koja pripadaju općini, gradu i Kantonu i sve mjere zaštite i spašavanja koje mogu doprinijeti sprečavanju nastanka opasnosti ili nesreće ili ublažavanja njenog djelovanja, kao i mjere, postupke i zadatke koje su u funkciji spašavanja zaštite i zbrinjavanja ljudi i materijalnih dobara ugroženih tom opasnošću, odnosno nesrećom.

### **Član 3. (Pružanje pomoći)**

Kantonalni Štab civilne zaštite odlučuje o pružanju pomoći štabovima civilne zaštite drugih kantona na osnovu zahtjeva Federalnog štaba civilne zaštite kada se ukaže potreba za tom pomoći i pruža pomoć općinskim štabovima civilne zaštite na području Kantona u izvršavanju poslova iz njihove nadležnosti.

## **DIO TREĆI**

### **ORGANIZACIJA I SASTAV KANTONALNOG ŠTABA**

#### **Član 4. (Sastav Kantonalnog Štaba)**

Kantonalni Štab sastoji se od komandanta, načelnika štaba i trinaest članova štaba.

#### **Član 5. (Komandant Kantonalnog Štaba)**

Premijer Kantona je po položaju komandant Kantonalnog Štaba.

#### **Član 6. (Načelnik Kantonalnog Štaba)**

Direktor Kantonalne uprave civilne zaštite ( u daljem tekstu: Uprave) po položaju je načelnik Kantonalnog Štaba.

#### **Član 7. (Član Kantonalnog Štaba po funkciji)**

Sekretar Crvenog križa Unsko-sanskog kantona po funkciji je član Kantonalnog Štaba.

#### **Član 8. (Članovi Kantonalnog Štaba)**

- (1) Članovi Kantonalnog Štaba iz kantonalnih ministarstava, kantonalnih uprava, kantonalnih upravnih organizacija i javnih ustanova kantona su:
  - a) policijski službenik iz Ministarstva unutrašnjih poslova čina glavnog inspektora ili generalnog inspektora policije,
  - b) rukovodeći državni službenik iz Ministarstva privrede,
  - c) rukovodeći državni službenik iz Ministarstva zdravstva, rada i socijalne politike,
  - d) dva rukovodeća državna službenika iz Ministarstva za građenje, prostorno uređenje i zaštitu okoliša,
  - e) tri rukovodeća državna službenika iz Ministarstva poljoprivrede, vodoprivrede i šumarstva,
  - f) rukovodilac organizacione jedinice iz JU Direkcija regionalnih cesta Unsko-sanskog kantona.
- (2) Ostala tri člana Kantonalnog Štaba određuje direktor Uprave iz reda državnih službenika koji obavljaju poslove osnovne djelatnosti iz nadležnosti Uprave.

**Član 9.**  
**(Postavljenje i razrješenje člana Kantonalnog Štaba)**

- (1) Komandanta, načelnika i članove Kantonalnog Štaba postavlja i razrješava Vlada Kantona na prijedlog Uprave, koji je usaglašen sa rukovodiocima kantonalnih organa uprave i javnih ustanova iz člana 8. ove Uredbe.
- (2) Kantonalni Štab vrši poslove iz svoje nadležnosti samostalno i za svoj rad odgovara Vladi Kantona.

**Član 10.**  
**(Angažovanje stručnjaka)**

- (1) U izvršavanju složenijih zadataka zaštite i spašavanja Kantonalni Štab civilne zaštite može angažovati i druge državne službenike iz kantonalnih organa uprave i stručnjake na profesionalnom radu u naučnim ustanovama i drugim pravnim licima.
- (2) O angažovanju lica iz stava (1) ovog člana odlučuje komandant štaba na prijedlog načelnika ili nekog od članova Kantonalnog Štaba.

**Član 11.**  
**(Sjednice Kantonalnog Štaba)**

- (1) Sjednice Kantonalnog Štaba saziva i njima predsjedava komandant Kantonalnog Štaba.
- (2) U slučaju da je komandant spriječen da vrši svoju funkciju sjednice Kantonalnog Štaba saziva i njima predsjedava načelnik štaba.
- (3) Kantonalni Štab donosi Poslovnik o radu.

**Član 12.**  
**(Pečat Kantonalnog Štaba)**

Kantonalni štab ima pečat koji se izdaje u skladu sa Zakonom o pečatu Unsko-sanskog kantona ("Službeni list Unsko-sanskog kantona" broj: 1/95, 3/97, i "Službeni glasnik Unsko-sanskog kantona" broj: 18/04).

**Član 13.**  
**(Sjedište Kantonalnog Štaba)**

Sjedište Kantonalnog Štaba je u Bihaću, a sjednice se održavaju u mjestu određenom Poslovníkom o radu štaba.

**Član 14.**  
**(Stručna služba Kantonalnog Štaba)**

- (1) Funkciju stručne službe Kantonalnog Štaba vrši Uprava.
- (2) U vršenju poslova stručne službe štaba, Uprava obavlja stručne, administrativno-tehničke i druge poslove za potrebe štaba što se bliže utvrđuje Pravilnikom o unutrašnjoj organizaciji Uprave.

**DIO ČETVRTI**

**OPREMANJE I FINASIRANJE KANTONALNOG ŠTABA**

**Član 15.**  
**(Opremanje Kantonalnog Štaba)**

- (1) Kantonalni Štab se oprema odgovarajućom opremom i materijalno-tehničkim sredstvima koja su neophodna za ličnu zaštitu članova štaba i za izvršavanje zadataka iz njegove nadležnosti.
- (2) Opremanje Kantonalnog Štaba vrši se u skladu sa Materijalnom formacijom Kantonalnog Štaba koja je sastavni dio ove Uredbe.

**Član 16.**  
**(Finansiranje Kantonalnog Štaba)**

1) Finansiranje rada Kantonalnog Štaba vrši se:

- a) sredstvima koja se obezbjeđuju u Budžetu Kantona,
- b) sredstvima posebne naknade za zaštitu od prirodnih i drugih nesreća koja se obezbjeđuju u skladu sa članom 180. Zakona o zaštiti i spašavanju.

**Član 17.**  
**(Materijalna formacija Kantonalnog štaba civilne zaštite)**

R/b	ŠIFRA	OPREMA I MATERIJALNO-TEHNIČKA SREDSTVA	MJERNA JEDINICA	KOLIČINA	NAPOMENA
1	2	3	4	5	6
1.		Odjeća i obuća	kpl	15	komplet broj 1
2.		Komplet za ličnu RHB zaštitu	„	15	komplet broj 2
3.		Pribor za jelo	„	15	komplet broj 3
4.		Džepna lampa	kom	15	
5.		Akumulatorska lampa - prenosna	kom	2 - 4	
6.		Torbica sa priborom za pisanje	kpl	15	
7.		Komandni dozimeter	kom	1	
8.		Punjač komandnog dozimetra	„	1	
9.		Čitač ličnog dozimetra	„	1	
10.		Radio uređaj VHF (bazna stanica)	„	1	
11.		Radio uređaj VHF (mobilni)	„	15	
12.		Ručna busola	„	2 - 3	
13.		Kurvimeter	„	2	
14.		Dvogled	„	2 - 4	
15.		Karta USK-a 1 : 50000	„	1	
16.		Karta BiH razmjera 1 : 2000000	„	2 - 5	
17.		Ručni kalkulator (digitron)	„	3 - 5	
18.		Plinsko grijalo ili peč na čvrsto gorivo	„	1 - 2	
19.		Foto aparat digitalni	„	2	
20.		Megafon	„	3	
21.		Aparat za gašenje požara	„	2	
22.		Daljinomjer laserski	„	1	
23.		Kopir aparat	„	1	
24.		GPS navigacioni uređaj	kom	3	
25.		GPS navigacioni uređaj ručni	„	3	
26.		GSM aparat – mobilni telefon	„	15	
27.		Prostorija opremljena za rad štaba	„	1	
28.		Satelitski telefon	„	1	
29.		Video kamera digitalna	„	1	
30.		Modem USB bežični za mobilni internet	„	1	
31.		Telefonski aparat stacionarni	„	1	
32.		Telefax	„	1	
33.		Radio prijemnik - tranzistor	„	1	
34.		Televizor	„	1	
35.		Sanduk za dokumenta	„	1	
36.		Radiološki detektor (automatski)	„	1	
37.		Hemijski detektor (automatski)	„	1	
38.		Prenosni PC (laptop) sa pripadajućom printerskom opremom.	„	2 - 5	
39.		Štampač - skener	„	3 - 5	
40.		Pribor za pisanje i crtanje i ostali kancelarijski materijal	kpl	2 - 4	
41.		Šator za smještaj do 20 osoba	„	1 - 2	
42.		Šator komandni	„	1	
43.		Šator kuhinja i trpezarija	„	1	
44.		Kuhinja prijenosna (50 l)	„	1	

45.	Prikolica teretna do 1 tone	„	2	
46.	Oprema za rasvjetu	kpl	1	
47.	Plastični kanister za vodu (20 l)	kom	2 - 5	
48.	Poljski krevet	„	15	
49.	Vreća za spavanje	„	15	
50.	Deka	„	15	
51.	Torba bolničara	„	1	
52.	Agregat (3,5 - 5 KW)	„	1	
53.	Putničko vozilo	„	1	
54.	Terensko vozilo	„	1	
55.	Vozilo - kombi 15 - 20 osoba	„	1	
56.	Teretno vozilo do 2 tone	„	1	

## DIO PETI

### PRELAZNE I ZAVRŠNE ODREDBE

#### **Član 18.** **(Rok za postavljenje članova Kantonalnog Štaba)**

Postavljenje komandanta, načelnika i članova Kantonalnog Štaba izvršiće se najkasnije u roku od petnaest dana od dana stupanja na snagu ove Uredbe.

#### **Član 19.** **(Prestanak važenja ranije Uredbe)**

Danom stupanja na snagu ove Uredbe, prestaje da važi Uredba o Kantonalnom štabu civilne zaštite („Službeni glasnik Unsko-sanskog kantona“ broj: 13/04, 2/09, 11/11).

#### **Član 20.** **(Stupanje na snagu)**

Ova Uredba stupa na snagu narednog dana od dana objavljivanja u „Službenom glasniku Unsko-sanskog kantona“.

Broj: 03-017-1230/2019. godine  
Bihać: 17. decembar 2019. godine

**Premijer Kantona**  
\_\_\_\_\_  
**mr.sci. Mustafa Ružnić**